



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

*Komunikadu Imprensa
09 Abril 2013*

**JSMP realiza semináriu iha Eskola Sekundáriu Kolejio São Miguel Arcanjo
Same-Manufahi**

Iha 5 Abril 2013 JSMP liuhusi Unidade Justisa ba Feto (WJU) halo semináriu ba estudante ensinu sekundáriu feto iha Eskola Sekundáriu São Miguel Arcanjo Same. Semináriu ne'e ho tema "*Enkoraja estudante feto hodi hili fakuldade de direitu bainhira akaba sira-nia estudu*".

Estudante feto hamutuk na'in 20 mak partisipa iha semináriu ne'e, no aprende kona-ba knaar autór tribunál hanesan juis, prokuradór, defensor no advogadu. Aleinde ne'e, sira aprende mós kona-ba Lei Kontra Violénsia Doméstika no Kódigu Penál.

"JSMP espera katak liuhusi programa semináriu ne'e bele atrai interese estudante feto hodi hili fakuldade direitu nune'e bele atinji igualdade jéneru iha setór justisa," dehan Diretór Ezekutivu JSMP, Luis de Oliveira Sampaio.

Iha semináriu ne'e fasilitadór sira apresenta kona-ba knaar autór tribunál no priviléjiu husi sira-nia kareira nomós dezafiu balun ne'ebé durante sira infrenta bainhira tuir kursu iha Centru Formasaun Judisiáriu.

Partisipante sira haktuir katak semináriu ne'e importante tebes tanba esplika kona-ba knaar autór tribunál aleinde ne'e esplika mos kona-ba sira-nia direitu ne'ebé regula iha lei. Partisipante iha semináriu ne'e dehan katak JSMP nia prezensa iha futuru importante tebes hodi bele hakle'an liután koñesimentu iha asuntu lei no direitus umanus.

JSMP hein katak ho atividade hirak ne'e, bele kontinua hametin di'ak liu partisipasaun feto nian iha dezvoltamentu setór justisa iha tempu agora no ba futuru.

Programa semináriu ne'e realiza ho apoiu finanseiru husi **The Royal Norwegian Embassy** iha Jakarta, Indonézia.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883 / 77810637